



جَبَانْ مُفْتِنْ كِنْجَانْ

JABATAN MUFTI KERAJAAN
JABATAN PERDANA MENTERI
NEGARA BRUNEI DARUSSALAM

TAHUN 1 BILANGAN 1

ZULHIJJAH 1417 / APRIL, 1997

RAJA 'BERKORBAN' Suatu Sejarah



Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan dan Yang Di-Pertuan Negara Brunei Darussalam selepas berkenan menyerahkan pisau sejurus sebelum ibadah korban dimulakan.

Ibadah Korban merupakan amalan yang sangat digalakkan di dalam Islam. Walaupun amalan ini tidak diwajibkan dalam Syariat Islam, namun ia tetap menjadi komitmen yang tinggi dalam diri umat Islam di Negara Brunei Darussalam.

Di ibu negara, pada 18 April, 1997 bersamaan 10 Zulhijjah, 1417, selepas menuaikan sembahyang sunnat 'Idil Adha bertempat di Jame' Asr Hassanal Bolkiah, tercatat suatu sejarah yang tidak boleh dilupakan dimana Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam telah melaksanakan ibadah korban bagi diri baginda dan juga keluarga baginda.

Majlis bersejarah yang julung-julung kali diadakan sebagai majlis rasmi dalam mengagungkan hari-hari kebesaran Islam diperingkat negara itu adalah merupakan penonjolan oleh seorang raja dan pemimpin Islam yang sangat perihatin terhadap amalan berugama. Tidak syak lagi, ini adalah satu pimpinan yang sangat bermakna, yang sangat tinggi nilainya. Ia bukanlah mudah didapati, hatta disepanjang sejarah kita sendiri, bahkan dimananya juga. Adalah amat jarang kita mendengar dikalangan raja-raja Islam atau pemimpin-pemimpin tertinggi umat Islam yang berbuat demikian itu bersama-sama dengan rakyat jelata,

dengan menjadikannya satu upacara rasmi dan terbuka sebagai syiar yang diagungkan.

Sungguhpun perbuatan berkurban itu biasa sahaja dibuat oleh orang-orang Islam, namun apabila raja sendiri berangkat melakukannya, ia akan menjadi berbeza. Ia bukan lagi setakat saja-saja berkurban, malahan adalah satu "Pimpinan", iaitu cetusan dari wawasan yang amat jauh lagi bijaksana. Kesannya pula bukanlah sekadar kita akan bergembira kerana memperolehi daging korban, tetapi juga sekaligus turut membajai semangat berugama dikalangan rakyat.

Melaksanakan korban pada hari Nahar 10 Zulhijjah dan pada hari tasyrik 11-13 Zulhijjah telah dijanjikan akan mendapat pahala yang besar, lebih-lebih lagi sebagai seorang raja, Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam akan mendapat pahala yang berlipat ganda kerana baginda telah dan akan menjadi ikutan kepada rakyat jelata dalam menegakkan syiar Islam di samping pahala korban itu sendiri iaitu sesuai dengan hadis Nabi Muhammad Sallallahu 'Alaihi Wasallam yang bermaksud:

"Dari sahabat Abu Hurairah radiallahu anhu berkata: Rasullullah Sallallahu 'Alaihi Wasallam

menarik Di Dalam

- Mufti dan Jabatan Mufti Kerajaan: Suatu Catatan Ringkas
- Fatwa Mengenai Hole-in-One
- Akhlak Rasulullah Sallallahu 'Alaihi Wasallam
- Tokoh Ugama Yang Disegani
- Qaul Muktamad is the Basic Guideline of Fatwa
- Kelebihan Selawat Tafrijiyah
- Bersihkah Pakaian menggunakan Mesin Pembasuh?

bersabda: Siapa yang mengajak ke jalan hidayat, maka baginya dari pahala, seperti pahala (sebanyak mana pahala) pengikutnya, dengan tidak mengurangi sedikitpun dari pahala mereka. Dan siapa yang mengajak ke jalan sesat, maka menanggung dosa sebanyak dosa-dosa pengikutnya, dengan tidak mengurangi dari dosa-dosa mereka itu." (Riwayat Muslim)

Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam telah mengorbankan tujuh ekor kambing bagi diri baginda sendiri dan dua belas ekor lembu dan kerbau bagi keluarga baginda sempena sambutan Hari Raya Korban tahun ini.

Antara fadilat yang akan diperolehi oleh yang melaksanakan ibadat korban itu ialah sebagaimana yang diriwayatkan oleh 'Aisyah Radiallahu Anha, bahwasanya Rasulullah Sallallahu Alaihi Wasallam bersabda yang bermaksud:

"Tidak ada sesuatu amalan yang dikerjakan oleh anak Adam pada Hari Raya Haji yang lebih disukai oleh Allah dari menumpahkan darah. Bahwasanya ia (korban itu) datang pada hari kiamat

[Bersambung muka 2]

LISAN JABATAN

بِسْمِ اللَّهِ الرَّحْمَنِ الرَّحِيمِ

Dalam era globalisasi dan sistem teknologi informasi canggih, umat Islam terdedah kepada berbagai maklumat dari segenap penjuru dan sudut media, samada media yang bersifat membina mental dan spiritual yang selaras dengan anjuran Islam ataupun yang sebaliknya. Keadaan seperti ini perlu diimbangi dan diperkaya dengan berbagai bahan maklumat Islam, bimbingan Islam dan lain-lain yang bersifat ke arah membina moral umat Islam dan menangkis media yang bersifat negatif dan meruntuhkan Islam.

Dalam keadaan sedemikian, Jabatan Mufti Kerajaan ikut menyumbang ke arah memperkaya bahan bacaan tempatan yang berunsur keugamaan. Melalui *suratberita* ini, ia akan menjadi wadah penyiaran dan penyaluran hasil dan khidmat Jabatan Mufti Kerajaan, disamping dapat memberi maklumat ilmu dan kegiatannya sesuai dengan wawasan, matlamat dan strategi yang dirancang. Dengan pendekatan ini, hubungan yang bersifat ukhuwah Islamiah antara Jabatan Mufti Kerajaan dan orang ramai, akan dapat dieratkan dari masa ke semasa.

Sepanjang keluarannya, *suratberita* ini Insya Allah akan diisi dengan bahan-bahan yang berguna seperti Fatwa, bimbingan Hukum, akhlak Rasulullah dan amalan-amalan yang baik, yang diharatkan menjadi bimbingan supaya umat Islam akan sentiasa terpimpin di atas landasan yang betul. Selain itu dimuatkan juga bahan-bahan mengenai maklumat tokoh atau kitab, wawasan dan pentadbiran serta berita kegiatan Jabatan Mufti Kerajaan dan Sudut Tarbiah Minda.

Kesemua kandungan bahan-bahan yang dinyatakan itu akan sentiasa menjurus ke arah menyiarkan syiar dan keindahan Islam Ugama Allah Yang Maha suci.

ALU-ALUAN MUFTI KERAJAAN

بِسْمِ اللَّهِ الرَّحْمَنِ الرَّحِيمِ

الْحَمْدُ لِلَّهِ رَبِّ الْعَالَمِينَ، وَبِسَمْعِنَّ عَلَى أَمْرِ الرَّبِّيْنَ وَالدَّيْنِ،
وَالصَّلَاةُ وَالسَّلَامُ عَلَى سَيِّدِنَا مُحَمَّدٍ وَآلِهِ وَصَحْبِهِ أَحَدَنِينَ، أَمَّا بَعْدُ

Alhamsdulillah, dengan izin Allah jua, *Suratberita* terbitan Jabatan Mufti Kerajaan, Jabatan Perdana Menteri ini dapatlah diusahakan. Saya percaya kelahirannya akan turut memeriahkan lagi terbitan-terbitan yang sudah sedia ada. Ia akan menjadi rakan kepada terbitan-terbitan yang lain di bawah kendalian lain-lain pihak di dalam kerajaan.

Prinsip yang dipegang oleh *Suratberita* terbitan Jabatan Mufti Kerajaan, Jabatan Perdana Menteri ini ialah semata-mata untuk mencari keredhaan Allah Subhanahu Wata'ala jua. Tidak ada yang lain dari itu.

Maka kearah ini, kita akan mengamalkan konsep Amar Ma'ruf dan Nahy Mungkar (mengajak atau menyeru kepada kebajikan dan melarang atau menegah dari perkara-perkara yang dikeji oleh syara'). Ia akan kita pegang terus menerus sebagai landasan menyampaikan irstyd dan nasihat-nasihat keugamaan kepada umat Islam.

Sepatah dua atau sebaris dua ungkapan tentang kebajikan itu ganjarannya besar sekali di sisi Allah, sehingga menjadikannya tidak mungkin dinilai atau dianggarkan dengan angka. Dan kerana itulah juga Allah Subhanahu Wata'ala telah menghukum umat dahulu kala dengan kehancuran apabila mereka itu tidak lagi komited dengan Amar Ma'ruf dan Nahy Mungkar di dalam kehidupan mereka.

Oleh itu saya berharap konsep ini akan terus dipupuk dan dikembangkan oleh *Suratberita* terbitan Jabatan Mufti Kerajaan, Jabatan Perdana Menteri, dengan masyarakat pula perlu memberikan sokongan yang erat dan padu kearah kelangsungannya.

Semoga Allah memberkatinya (*Suratberita* ini) serta juga menerimanya sebagai khidmat bakti yangikhlas bagi Ugama, Raja, Bangsa dan Tanahair, Brunei Darussalam.

Wallahu Waliyyut Taufeq

[dari muka 1]

dengan tanduk-tanduknya dan bulu-bulunya dan kuku-kakunya, dan bahwasanya darah (korban itu) mendapat tempat yang mulia di sisi Allah sebelum darah itu tumpah ke bumi, oleh kerana itu hendaklah kamu berkorban dengan hati yang bersih.” (Hadis Riwayat Tirmizi)

Selain itu, sebuah hadis yang diriwayatkan oleh Ibnu Abbas Radhiyallahu anhu menyebutkan yang bermaksud:

“Tidak ada sesuatu yang dibelanjakan dari mata wang yang lebih baik dari menyembelih (korban) pada hari raya.” (Hadis Riwayat Ad-Daraquthni)

Penyembelihan binatang korban itu disempurnakan oleh Yang Dimuliakan Pehin Siraja Khatib Datu Paduka Seri Setia Ustaz Haji Awang Yahya bin Haji Ibrahim dan beberapa orang pegawai masjid sejurus menerima pisau dari baginda, yang didahului dengan bacaan Surah Al-Faatihah oleh Mufti Kerajaan, Yang Dimuliakan Lagi Dirhormati Pehin Datu Seri Maharaja Dato Paduka Seri Setia Ustaz Haji Awang Abdul Aziz bin Juned.

Berangkat diupacara itu ialah Yang Teramat Mulia Paduka Seri Duli Pengiran Muda Haji Al-Muhtadee Billah, Duli Yang Teramat Mulia Paduka Seri Pengiran Perdana Wazir Sahibul Himmah Wal-Waqar Pengiran Muda Mohamed Bolkiah, Yang Teramat Mulia Paduka Seri Duli Pengiran Muda Haji Abdul Azim, Yang Teramat Mulia Paduka Seri Duli Pengiran Muda Abdul Malik dan Yang Teramat Mulia Paduka Seri Duli Pengiran Muda Abdul Mateen.

Juga turut berangkat dan hadir ialah Yang Amat Mulia Pengiran-Pengiran Cheteria, Yang Berhormat Menteri-Menteri Kabinet, Ahli Majlis-Majlis Mesyuarat, Timbalan-Timbalan Menteri, Setiausaha Setiausaha Tetap, Para Perwakilan Asing, Deif-Deif Kenamaan dan Umat Islam.



MUFTI

DAN JABATAN MUFTI KERAJAAN


SUATU CATATAN RINGKAS

Negara Brunei Darussalam buat pertama kalinya mempunyai seorang Mufti yang dilantik menurut kehendak Undang-Undang Majlis Ugama Islam dan Mahkamah-Mahkamah Kadi No: 20/1955 yang dikuatkuasakan pada tahun 1956, ialah apabila Al-Marhum Sultan Haji Omar Ali Saifuddien Sa'adul Khairi Waddien memperkenankan perlantikan Awg. Haji Ismail bin Umar Abd. Aziz (Allahyarham Pehin Datu Seri Maharaja Dato Seri Utama Dr Hj. Ismail) menjadi Mufti Kerajaan pada bulan April 1962. Perlantikan Allahyarham Pehin itu selama 3 tahun, iaitu sehingga tahun 1965.

Pada bulan Mac 1967 Allahyarham Pehin itu telah diperkenankan semula menjadi Mufti Kerajaan. Jawatan itu dijawat sehinggalah sampai ke zaman pemerintahan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah, Sultan Dan Yang Di-Pertuan Negara Brunei Darussalam.

Semasa Allahyarham Pehin itu menjadi Mufti Kerajaan, Pejabat Mufti merupakan salah satu daripada bahagian di Jabatan Hal Ehwal Ugama. Apabila Jabatan Hal Ehwal Ugama dinaikkan tarafnya menjadi sebuah kementerian pada 21 Oktober 1986 ianya diletakkan pula di bawah Jabatan Hal Ehwal Syara'iah, Kementerian Hal Ehwal Ugama.

Pada 1 Januari 1989 pula, Negara Brunei Darussalam buat pertama kalinya mempunyai seorang Timbalan Mufti Kerajaan. Jawatan



Allahyarham Pehin Datu Seri Maharaja Dato Seri Utama Dr Haji Ismail bin Umar Abd. Aziz



Yang Dimuliakan Lagi Dihormati Pehin Datu Seri Maharaja Dato Paduka Seri Setia Ustaz Haji Awang Abd. Aziz bin Juned.

ini dijawat oleh Yang Dimuliakan Pehin Tuan Imam Dato Paduka Seri Setia Ustaz Haji Awg. Abd. Aziz bin Juned (sekarang Yang Dimuliakan Lagi Dihormati Pehin Datu Seri Maharaja).

Pada 1 September 1994 Yang Dimuliakan Lagi Dihormati Pehin telah dinaikkan pangkat menjadi Mufti Kerajaan. Kemudian pada 7 November 1994 dengan Titah Perintah Kebawah Duli Yang Maha Mulia Paduka Seri Baginda Sultan Dan Yang Di Pertuan Negara Brunei Darussalam, Jabatan Perdana Menteri memaklumkan penubuhan Jabatan Mufti Kerajaan. Dengan penubuhan itu Jabatan Mufti Kerajaan tidak lagi di bawah Kementerian Hal Ehwal Ugama, tetapi menjadi sebuah jabatan berasingan di bawah Jabatan Perdana Menteri. Mufti Kerajaan bertanggungjawab terus kepada Kebawah Duli Yang Maha Mulia pada menyembahkan apa jua perkara berkaitan dengan tugas-tugas sebagai Mufti Kerajaan.

Sebelum Jabatan Mufti Kerajaan Jabatan Perdana Menteri ditubuhkan, sewaktu ia merupakan ‘bahagian’ dari Kementerian Hal Ehwal Ugama, tugas dan fungsinya hanyalah secara tradisi sahaja iaitu mengeluarkan fatwa kepada pertanyaan yang diajukan. Dengan tertubuhnya Jabatan Mufti Kerajaan Jabatan Perdana Menteri, Institusi fatwa mempunyai tugas bukan sahaja untuk melaksanakan tugas tradisi tersebut, tetapi juga untuk menjadi Pusat Ilmu Pengetahuan dimana maklumat mengenai Islam dan umat Islam dikumpul dan disebarluaskan. Jabatan Mufti Kerajaan Jabatan Perdana Menteri dalam melaksanakan tugas baru ini, ia dibahagikan kepada lapan fungsi:

- * Ifta
- * Buhuth dan Irsyad
- * Tasyrie'
- * Urusetia Fatwa
- * Qismul hikmah
- * Penerbitan dan Penerangan
- * Kakitangan dan Perkhidmatan
- * Perancangan dan Kewangan

HADIAH HOLE-IN-ONE DALAM PERMAINAN GOLF

SOALAN:

Dalam Permainan golf ada satu acara dinamakan hole-in-one dan hadiahnya begitu lumayan sampai sebuah kereta yang mahal. Apakah hukum disegi Islam mengenai hole-in-one, adakah merupakan judi kerana ianya merupakan nasib bukannya chance?

Jawapan:

لَا يَحِلُّ لِرَبِّ الْأَنْعَمِ وَالشَّاةِ
وَالسَّلَامُ عَلَى أَخْرَفِ الْمُرْسَلِينَ وَعَلَى
اللَّهِ وَمَنْهُ أَنْجَيْتُمْ هَذِهِ

لِلصُّوَابِ، وَعَدْ

Permainan golf telah dianggap suatu perkara kemahiran, seperti juga halnya dengan memanah, menembak dan sebagainya. Sesebuah kelab golf biasanya mengadakan perlawanan diantara ahli-ahlinya dan juga perlawanan-perlawanan terbuka.

Demikian juga persatuan-persatuan golf diberbagai peringkat mengendalikan perlawanan-perlawanan peringkat kebangsaan dan juga diserata dunia, sehingga permainan golf itu sudah menjadi bidang kerjaya dan profesi yang menarik, ditambah lagi dengan perlawanan-perlawanan itu biasanya menawarkan hadiah-hadiah yang bernilai tinggi. Maka atas semua ini golf telah turut memainkan peranan dalam pertumbuhan ekonomi apabila terwujudnya industri yang berkaitan, dengannya seperti industri membuat peralatan-peralatan pakaian dan minuman yang berkaitan dengan golf itu. Bahkan bagi negara-negara yang serius dengannya, barangkali ia telah dijadikan sebagai komponen dari industri pelancongan.

Demikian secara ringkas kedudukan permainan atau sukan golf itu. Jika ia hanya sebagai permainan semata-mata adalah hukumnya harus jua. Berbeza sekiranya terdapat perkara-perkara lain yang menjadi tegahan syara' dilibatkan kepadanya.

Diantara perkara-perkara yang menjadi tegahan syara' itu, ialah seperti perjudian, ataupun jika permainan itu sendiri boleh membawa seseorang yang bermain itu sampai terlupa kepada kewajipannya terhadap Allah dan lain-lain.

Apapun jua permainan yang boleh menyebabkan tertinggalnya tuntutan wajib dalam ugama, seperti sembahyang fardhu dan lain-lain, adalah ia haram. Demikian juga jika sampai menyebabkan terabainya segala hak dan kewajipan yang wajib ditunaikan.

Namun, tidaklah dapat diramalkan

sejauhmana kesan negatifnya permainan itu boleh menjelaskan hak-hak dan kewajipan-kewajipan seseorang.

Tetapi bagaimanapun, yang perlu bagi kita ialah mengetahui bahawa perintah Allah adalah tetap dan pasti berlaku untuk kita umat Islam mesti dan wajib menuaikan setiap hak bagi sesiapa jua yang ampunya hak, sebagaimana hadis Nabi Sallallahu 'Alaihi Wasallam di bawah ini:

إِنَّ لِرَبِّكَ عَلَيْكُمْ حُقُوقٌ وَلَنْ تَنْهَاكُمْ عَنِّيهَا إِنَّمَا عَلَيْكُمْ حُقُوقٌ فَاقْطُعُوهُ كُلُّهُ وَلَا حَرَجَ لَكُمْ

Bermaksud: "Sesungguhnya atasmu ada hak (yang hendak ditunaikan) terhadap Tuhanmu dan atasmu ada hak (yang hendak ditunaikan) terhadap dirimu sendiri dan atas dirimu ada hak (yang hendak ditunaikan) terhadap keluargamu, maka berikanlah oleh mutiara-tiap yang ampunya hak itu akan haknya."

(Hadis Riwayat Al-Bukhari)

Sebagai untuk renungan jua cuba kita lihat Berita Harian Malaysia, Rabu 9 Ogos, 1995 di bawah tajuk: "Jangan abai kerja kerana golf". Seorang ketua kerajaan telah menegur sikap pegawai kerajaan yang terlalu leka bermain golf sehingga mengabaikan tanggungjawab mereka dalam menjalankan tugas. Malah, kata pemimpin itu ada pegawai kerajaan yang tidak melaksanakan tugasnya dengan baik kerana sudah memikirkan untuk bermian golf jam 3 petang. Jika jam 3 petang sudah siap sedia hendak ke padang golf, ini sudah tentu menjelaskan tugas mereka."

Sila juga lihat Utusan Malaysia Jumaat 1 November, 1996 di bawah tajuk: "Pendidik, Pegawai dipecat kerana bermian golf":

SEOUL 31 Okt. - Seramai 19 pendidik dan kakitangan kerajaan Korea Selatan mungkin dipecat kerana bermian golf semasa waktu bertugas, kata pemeriksa kerajaan hari ini.

Mereka yang bakal dipecat itu, termasuk profesor universiti, pengetua sekolah menengah dan eksekutif bank dan syarikat, ditemui bermian golf di tiga padang golf tentera pada awal September, menurut pihak Pejabat Audit dan Pemeriksaan (OIA).

"Tindakan disiplin akan disyorkan terhadap 19 orang itu serta kakitangan awam lainnya yang didapati bermian golf semasa waktu bertugas," kata jurucakap OAE.

Juruaudit telah menjalankan siasatan secara rahsia di padang golf sejak Presiden Kim Young Sam, seorang bekas penentang kerajaan, mengharamkan pegawai kerajaan daripada bermian golf sebagai sebahagian kempen antirasuah yang dilancarkannya.

Para pegawai kerajaan dan kakitangan syarikat kendalian kerajaan pernah dipecat kerana bermian golf. AFP"

Lihatlah kandungan berita di atas ini, keduaduanya mengenai dengan permainan golf, iaitu betapa pengaruh golf itu nampak-nampaknya sampai mendorong seseorang menyalahgunakan masa bertugas dan lain-lain yang tidak diingini.

Dua berita tersebut baru kita dapat menjurus kepada kesan negatifnya dari segi, ianya boleh membawa kepada menyalahgunakan masa bertugas dan rasuah yang sangat-sangat dilarang dan bertentangan dengan peraturan serta etika pekerjaan. Belum lagi ianya dihubungkan dengan ugama - jika yang terlibat itu orang Islam.

Bagi kita orang Islam ada lebih banyak lagi perkara yang mesti diperhatikan.

Mengenai 'menyalahgunaan masa' sahaja, ada bermacam-macam kesalahan boleh terjadi, disamping salah satunya ialah menyalahgunaan masa bertugas. Bahkan yang lebih-lebih menjadi ukuran kesalahan dan dosa ialah menggunakan masa itu sehingga tertinggal kewajipan terhadap Allah seperti tertingginya sembahyang fardhu, ataupun sembahyang itu tidak dapat disempurnakan sebagaimana semestinya kerana sibuk atau bergegas untuk memenuhi jadual permainan.

Jika kewajipan terhadap Allah boleh terjejas, betapa kewajipan terhadap keluarga, anak isteri, ibu bapa dan jiran lebih-lebih lagi dengan senang sahaja boleh terabai.

Pada hal masing-masing itu ada hak-hak yang mesti ditunaikan. Hak keluarga umpamanya memerlukan perhatian dan pemadulian yang saksama; hak ibu bapa untuk menziarahi mereka; hak jiran untuk melawat jika mereka sakit, atau menuaikan undangan jika mereka mengundang dan lain-lain. Ini semua boleh menjadi dosa dan salah jika tidak ditunaikan dengan sewajarnya. Lain lagi kiranya permainan itu diikatkan dengan perkara judi atau ianya dijadikan landasan untuk berjudi, adalah juga sangat terang menjadi kesalahan dan

haram disisi syarat, iaitu seperti orang bermain dengan bertaruh, samada orang yang bermain itu sendiri yang bertaruh ataupun besar.

Adapun mengenai dengan hole-in-one dan hadiah keranannya, perlulah dilihat bagaimana hadiah itu diperolehi. Jika ianya diperolehi daripada seseorang, yang dengan hartanya sendiri suka memberikan hadiah itu kepada pemenang secara hole-in-one itu, maka adalah harus sebagai hadiah biasa kerana berjaya dalam ujian kepadai atau kebolehan, dengan syarat ianya tidaklah jadi perkara maksiat, atau dicampur dan dilibatkan dengan maksiat.

Berbeza kiranya ia dijadikan perkara maksiat, atau jadi sebab berlakunya maksiat, seperti terdapat pihak-pihak yang mengalami untung rugi kerananya seperti bertaruh atau lain-lain.

Atau seperti misalan ini: A telah bertindak menjadi penganjur permainan. Selaku penganjur, A ingin mencari penaja yang boleh menyumbangkan hadiah untuk pemenang hole-in-one. Penaja ini kita sebut sebagai B. Maka B pun dapat diperolehi berupa sebuah syarikat penjual kereta yang telah menyatakan kesanggupannya untuk menyumbangkan sebuah kereta yang berharga \$100,000/= sebagai hadiah kepada pemenang hole-in-one itu nanti.

B selaku penaja tidak mahu menanggung risiko kerugian sebanyak \$100,000/= itu secara bersendirian. Oleh itu ia pun mencari pihak ketiga (C) untuk membantunya mengurangkan beban kerugian tersebut, sehingga tidaklah akan sampai \$100,000/= ditanggungnya sendiri jika berlaku ada pemenang hole-in-one. C ini sebuah syarikat insuran.

Maka perundingan tawar menawar diantara B dan C pun dibuat, dimana C telah bersetuju menerima bayaran daripada B sebanyak \$30,000/= sebagai insuran, dengan pengertian, sekiranya terdapat pemenang hole-in-one itu, maka diatas C lah yang akan menanggung pembelian kereta berharga \$100,000/= untuk dihadiahkan kepada pemenang, dalam makna C tidak untung apa-apa malahan akan rugi sebanyak \$70,000/= lagi. Sementara B pula hanya rugi sebanyak \$30,000/= (harga insuran yang telah dibayarnya kepada C tadi). Sebaliknya jika tiada terdapat pemenang hole-in-one itu, maka C lah yang akan untung cuma-cuma sebanyak \$30,000/= sementara B sebagai penaja cuma rugi \$30,000/= sahaja sebagai pertaruhannya membayar harga insuran kepada C.

Dalam kedudukan seperti ini sekiranya berlaku, maka tidaklah diragukan bahawa permainan itu telah dilibatkan dengan judi

atau menjadi judi. Sedang judi itu hukumnya sudah jelas iaitu haram, berdasarkan dalil daripada Kitab Suci al-Qur'an, Firman Allah:

لَئِنْ تَبِعُنَّ مَا نَرَأَيْتُمْ فَوَصَلْتُ بِهِ
وَالْأَصْنَابَ وَالْأَرْضَمْ رَخْشَ قَنْ خَلَقْتُ
كَلْبَنِينْ فَإِنْجَبْتُهُ لَعْنَكُمْ تَغْلِبُونَ ۝
إِنَّمَا أَرْسَيْتُ الشَّيْطَانَ أَنْ يُوَرِّقَ بَيْنَكُمْ
الْعَدْوَةِ وَالْأَعْضَاءِ فِي الْخَمْرِ وَالْأَيْبِرِ
وَيَعْذِلُكُمْ عَنِ ذِكْرِ اللَّهِ وَعَنِ الصَّلَاةِ
فَهَذَا أَنْتُ شَهِيدٌ ۝
(Surah Al-Mulk: ۹۱-۹۰)

Tafsirnya: "Wahai orang-orang yang beriman! Bahawa sesungguhnya arak, dan judi, dan pemujaan berhala, dan mengundi nasib dengan batang-batang anak panah, adalah (semuanya) kotor (keji) dari perbuatan Syaitan. Oleh itu hendaklah kamu menjauhinya supaya kamu berjaya. Sesungguhnya Syaitan itu hanyalah bermaksud mahu menimbulkan permusuhan dan kebencian di antara kamu dengan sebab arak dan judi, dan mahu memalingkan kamu daripada mengingati Allah dan daripada mengerjakan sembahyang. Oleh itu, mahukah kamu berhenti (daripada melakukan perkara-perkara keji dan kotor itu atau kamu masih berdegil)?"

أَيْسِرٌ didalam ayat di atas bermakna judi, apa sahaja jenis perjudian.

Adapun perjudian itu diharamkan kerana ia membawa kepada berbagai keburukan seperti permusuhan, dan juga boleh menjerumuskan seseorang kepada memakan harta haram atau harta orang lain secara batil sedangkan memakan harta orang dengan cara yang batil itu ditegah oleh Allah, seperti firman-Nya:

وَلَا تَأْكُلُ آنِيَلَكُمْ بَيْنَكُمْ بِالْبَطْلَلِ
(Surah Al-Baqarah: 188)

Maksudnya: "Dan janganlah kamu makan (atau mengambil) harta (orang lain) di antara kamu dengan jalan yang salah." (Surah Al-Baqarah: 188)

Pengharaman ini juga termasuk seperti sabda Rasulullah Sallallahu 'Alaihi Wasallam:

إِنَّ رِجَالًا يَتَحَوَّلُونَ فِي مَالِ اللَّهِ بِعَيْنِ
حَتَّىٰ فَلَمْ يُؤْمِنُوا بِيَوْمِ الْقِيَامَةِ
(Riwayat Al-Bukhari)

Maksudnya: "Sesungguhnya orang-orang yang menceburkan diri dengan mengambil harta Allah secara tiada hak, maka baginya api neraka di hari Kiamat." (Hadis Riwayat Al-Bukhari)

Sabda Baginda lagi:

مِنْ أَكْسَرَ مَالًا مِنْ مَا شِئْتُ فَوَصَلْتُ بِهِ
رَحْمَةً أَوْ تَصْنَعْ بِهِ أَنْفَقَهُ فِي سِنِّ
الْحَمَّامِ كُلُّهُ حَمِيعًا فَقُدِّفْتُ بِهِ
فِي حَمَّامٍ
(Riwayat Abu Dardah - Al-Bukhari dan Muslim)
(202/2)

Bermaksud: "Barangsiapa yang memperolehi harta dari sumber dosa (haram seperti judi dan sebagainya), lalu dia menggunakan untuk menghubungkan silaturrahim atau bersedekah, atau berderma pada jalan Allah, maka dikumpulkan semua dan dicampakkan bersamanya (orang tersebut) ke dalam neraka Jahanam."

Hadis ini bermaksud bahawa apabila seseorang itu mempergunakan harta-harta haram bagi tujuan-tujuan yang baik sekalipun, semuanya itu tidaklah akan berkesan apa-apa melainkan dosa jua yang didapatnya serta neraka jahanam menjadi tempatnya.

Tetapi bagaimanapun, dia masih boleh bertaubat dan membersihkan diri dan keluarganya daripada harta haram itu, dengan cara menyerahkan semua harta haram itu kepada Baitul Mal atau lembaga yang diamanahkan bagi menjalankan kebajikan untuk masyarakat umat Islam, iaitu bukan sebagai sedekah atau derma, tetapi hanya melepaskan harta haram itu. Orang yang melakukan ini akan mendapat pahala kerana taubatnya dan juga kerana langkahnya melepaskan diri daripada harta haram itu.

Adapun mengenai dengan hole-in-one, sekiranya ia dijadikan atau terlibat atau dilibatkan dengan perjudian, maka hadiahnya itu adalah dinamakan hasil judi, dan hasil judi itu hukumnya haram. Mana-mana orang yang terlibat dengannya hendaklah bertaubat dan membersihkan diri daripada harta haram dengan cara menyerahkannya kepada Baitul Mal atau badan atau lembaga yang berkuasa mengenai masyarakat Islam.

Dengan itu, diharapkan Allah Subhanahu wa Ta'ala akan menerima taubatnya dan melepaskannya daripada golongan yang tidak diterima doa mereka seperti tersebut dalam hadis, sabda Rasulullah Sallallahu 'Alaihi Wasallam:

إِنَّ اللَّهَ عَلِيمٌ ، لَا يَقْتَلُ إِلَّا حَكِيمٌ - ثُمَّ
ذَكَرَ الرَّحْلَ بِعَيْنِ السَّفَرِ أَنْشَأَتْ أَغْزِيرَ
يَمْدُدُ بَدْنَهُ إِلَى السَّلَاءِ ، يَا رَبِّ يَا رَبِّ
وَمَطْعَمَةً حَرَامَ وَمُشْرِبَةً حَرَامَ وَمُنْكَبَةً
حَرَامَ وَمُنْكَبَى بِالْحَرَامِ فَإِنَّمَا يُنْتَهَى
لِذَلِكَ .
(Riwayat Muslim)

Maksudnya: "Bahwasanya Allah adalah baik, bersih dan tidak menerima kecuali yang baik, bersih. Kemudian Rasulullah Sallallahu 'Alaihi Wasallam menyebut: "Lelaki (seseorang) yang bersungguh-sungguh berbuat kebaikan dan menadahkan tangan ke langit berdoa Ya Allah! Ya Allah! sedangkan makanannya haram, minumannya haram, pakaiannya haram, dan diberi makan dengan yang haram, maka bagaimanakah doanya boleh diperkenankan?"

(Hadis riwayat Muslim)

Menggunakan harta dari sumber yang haram menjadikan ibadat tidak diterima oleh Allah. Sabda Rasulullah Sallallahu 'Alaihi Wasallam dalam suatu hadis panjang kepada seorang yang bertanya kepada Baginda, disebutkan dengan panggilan اخ العالية

يَا أَخَا الْعَالِيَةِ: إِنَّهُ مَنْ أَصَابَ مَالًاٍ مِنْ حَرَامٍ فَلَبِسَ مِنْهُ جَلْبَابًا، يَعْنِي قَمِيصًا لَمْ تُقْبَلْ صَلَاتُهُ حَتَّى يُنْحَى ذَلِكَ الْجَلْبَابُ عَنْهُ، إِنَّ اللَّهَ عَزَّ وَجَلَّ أَكْرَمُ وَأَحْلُّ يَا أَخَا الْعَالِيَةِ مِنْ أَنْ يَقْبَلْ عَمَلَ رَجُلٍ أَوْ صَلَاتُهُ وَعَلَيْهِ جَلْبَابٌ مِنْ حَرَامٍ.

(Hadis Rواية البزار)-الترغيب والترهيب

(٣-٤-٢٠٣/٢)

Bermaksud: "Wahai Saudara Al-'Aliyah bahwasanya barangsiapa yang memperolehi harta dari sumber yang haram, lalu dia pakai pakaian (jilbab) dari harta yang haram itu, maka tidak akan diterima sembahyangnya sehingga dia membuangkan pakaian itu daripadanya. Allah Yang Maha Kuat dan Maha Mulia, lebih mulia dan lebih Tinggi untuk menerima amalan atau sembahyang bagi seseorang yang terdapat di atasnya pakaian dari sumber yang haram."

Dalam hadis lain Rasulullah Sallallahu 'Alaihi Wasallam bersabda kepada Ka'b Ibn 'Ujrah:

يَا كَعْبَ ابْنَ عُجْرَةَ، إِنَّهُ لَا يَدْخُلُ الْجَنَّةَ لَحْمَ تَمَّ بَنْ مُسْخَتِ.

(رواية ابن حبان) دام كتاب صحيحن -
الترغيب والترهيب (٢٠٣/٢)

Maksudnya: "Wahai Ka'b ibnu 'Ujrah, Tidak akan masuk syurga (tubuh yang subur/sihat) dari harta haram."

AKHLAK RASULULLAH



KEKASARAN DILAYAN DENGAN KELEMBUTAN

Sifat marah muncul dari perasaan panas hati kerana sesuatu sebab yang tertentu seperti tersinggung perasaan, dihina, ditipu atau lain-lain sebab. Malahan dalam keadaan tertentu, marah itu ada kalanya wajar seperti kerana melihat atau mendengar ugama Islam dihina dan lain-lain.

Macam mana pula reaksi kita bila berhadapan dengan orang yang sedang marah? Mungkin berbagai jawapan akan diberikan. Yang pastinya pada umumnya marah dibalas dengan marah.

Dalam hubungan ini dapat dilihat bagaimana sikap Rasulullah Sallallahu 'Alaihi Wasallam dalam menghadapi orang marah. Abu Hurairah radhiallahu anhu berkata: Seorang datang kepada Nabi Sallallahu Alaihi Wasallam menagih hutang, maka dia berkata keras kepada Nabi hingga hampir akan dipukul oleh sahabat-sahabat Nabi Sallallahu 'Alaihi Wasallam. Tetapi Nabi bersabda:

Maksudnya:

"Biarkan dia, kerana bagi seorang yang berhak itu ada kebebasan berbicara. Kemudian Nabi bersabda, berilah kepadanya unta yang sama umurnya dengan yang kami hutang dahulu kepadanya".

Berkata sahabat: Ya Rasulullah, tiada ada yang sama, ada yang lebih tinggi (tua) umurnya, maka Nabi bersabda:

Maksudnya:

"Berikan kepadanya, maka sebaik-baik kamu ialah yang terbaik cara pembayaran atau pengembalian hutangnya".

Itulah akhlak Nabi Sallallahu 'Alaihi Wasallam dalam menghadapi seseorang yang berkata dengan keras ketika menagih hutang. Baginda tidak membalaunya dengan marah, tetapi menghadapinya dengan baik dan lembut serta membayar dengan yang lebih baik.

Dalam hubungannya dengan tugas sehari-hari, terutama bagi mereka yang sentiasa berhadapan dengan orang ramai, adalah suatu sifat yang terpuji jika kita dapat menyelesaikan sesuatu masalah dengan baik, lebih-lebih lagi bagi mereka yang bermasalah dan datang dengan marah-marah. Adalah menjadi suatu kejayaan apabila kita dapat menjadikan seorang yang datang berjumpa kita dengan keadaan marah kerana sesuatu perkara tetapi apabila keluar ia diiringi dengan perasaan lega dan senyum.

Oleh yang demikian, sayugia bagi setiap muslim memelihara dirinya dan keluarganya dari harta yang haram yang mana di akhir zaman ramai orang tidak memperdulikan lagi sumber rezekinya samada halal atau haram seperti yang dikhaskan oleh Rasulullah Sallallahu 'Alaihi Wasallam dalam sabdanya:

يَأَيُّهَا النَّاسُ زَمَانٌ لَا يَتَابُ إِلَى أَسْرَارِهِ مَا أَخَذَ أَمْنَ الْحَلَالِ أَمْ مِنَ الْحَرَامِ.

(رواية البخاري دان التساني)-الترغيب

والترهيب ٣٥٢

Maksudnya: "Akan tiba ke atas manusia suatu masa di mana orang tidak mempedulikan lagi apa yang dia ambil, samada dari yang halal atau dari yang haram."

Berasaskan ayat al-Qur'an dan hadis-hadis yang telah disebutkan di atas, maka mengambil atau menerima apa jua dari sumber yang haram itu adalah haram dan akan menjadi bala mendapat azab di akhirat serta amal ibadat tidak diterima oleh Allah Subhanahu Wata'ala.

وَاللَّهُ أَعْلَمُ

PEGANGAN 8 NASIHAT MUFTI DIAMALKAN



PEGAWAI-PEGAWAI BARU

Ke arah menuju dan mencapai tujuan dan matlamat Jabatan Mufti Kerajaan Jabatan Perdana Menteri, seramai 11 orang pegawai dari berbagai jabatan di bawah Kementerian Hal Ehwal Ugama telah dinaikkan pangkat untuk bertugas di Jabatan Mufti Kerajaan. Mereka mula bertugas pada 2hb. Januari 1997 dan ditempatkan di berbagai bahagian. Sementara itu 3 orang pegawai dan kakitangan Jabatan Mufti Kerajaan Jabatan Perdana Menteri juga telah dinaikkan pangkat.

1. Awg Haji Alias bin Pengarah Hj Jalil Ketua Pegawai Kerja Pemangku Penolong Pengarah Pentadbiran
2. Awg. Haji Mohd Talip bin Hj Karim Ketua Pegawai Kerja
3. Awg. Haji Mohidin bin Hj Mustapha Ketua Pegawai Perhubungan Awam
4. Awg Haji Duraman bin Hj Kula Pegawai Kerja Kanan
5. Awg Haji Yakob bin Hj Metali Pegawai Perhubungan Awam
6. Ak Haji Md Zin bin Pg Hj Omar Pegawai Fatwa
7. Awg Abu Kassim bin Ismail Penyemak Penerbitan Fatwa
8. Awg Haji Manaf bin Hj Nawi Ketua Pembantu Teknik
9. Awg Sahat bin Akim Kerani Akaun Tingkatan II
10. Awg Hj Yusuff bin Hj Zainal Kerani Tingkatan II
11. Dyg Hjh Puspa bte Hj Serudin Amin Ser
12. Dyg Tijah bte Hj Ahmad Kerani Fatwa Tingkat II
13. Dk Hjh Zunaidah bte Pg Hj Sulaiman Kerani Tingkatan III
14. Dyg Noor Lela bte Mohd Zaini Kerani Tingkatan III

Mufti Kerajaan menggariskan *pegangan 8* bagi pegawai dan kakitangannya dalam menjalankan tugas harian. *Pegangan 8* itu ialah:

1. Menegakkan hukum Islam.
2. Mendukung wawasan Raja.
3. Mengasuh dan memurnikan peribadi dengan taqwa.
4. Menanamkan ‘zeal’ untuk berilmu dan berwibawa.
5. Titih dalam pekerjaan.
6. Bekerja sebagai satu pasukan.
7. Banyak bekerja dari bercakap.
8. Bersifat tahan dalam menjaga rahsia.

Perkara ini dijelaskan oleh Yang Dimuliakan Lagi Dihormati Pehin Datu Seri Maharaja Dato Paduka Seri Setia Ustaz Haji Awg. Abd. Aziz bin Juned, Mufti Kerajaan di Majlis Perjumpaannya dengan pegawai dan kakitangan Jabatan Mufti Kerajaan Jabatan Perdana Menteri pada 9 Januari 1997 bersamaan 29 Sya'ban, 1417 di Bilek mesyuarat Bangunan Sekretariat di Ibu Negara.

Majlis Perjumpaan itu antara lain bertujuan untuk menerangkan fungsi dan matlamat Jabatan Mufti Kerajaan dan untuk mengeratkan hubungan dikalangan pegawai dan kakitangannya. Seramai 26 orang pegawai dan kakitangan menghadirinya termasuk 14 orang yang baru dilantik untuk berkhidmat dengan Jabatan Mufti Kerajaan Jabatan Perdana Menteri.

السلام عليكم ورحمة الله وبركاته

بسم الله الرحمن الرحيم، الحمد لله رب العالمين، والصلوة والسلام على سيدنا محمد وعلى الله وصحبه أجمعين

Alhamdulillah, syukur ke hadrat Allah Subhanahu Wataala kerana dengan izin dan rahmat Nya juga kita dapat hadir bersama-sama dalam majlis yang berkebajikan ini. Salawat dan salam ke atas junjungan kita Nabi Muhammad Sallallahu 'Alaihi Wasallam, kaum keluarga, para sahabat dan pengikut-pengikut Baginda hingga ke akhir zaman.

Terlebih dahulu saya mengucapkan berbanyak-banyak terima kasih kepada Jabatan Mufti Kerajaan, Jabatan Perdana Menteri, Negara Brunei Darussalam kerana telah memberikan penghargaan kepada saya untuk menghadiri majlis ini dan seterusnya melancarkan dua buah buku yang diterbitkan oleh Jabatan berkenaan iaitu Fatwa Mufti Kerajaan Negara Brunei Darussalam tahun 1994 - 1995 dan Irsyad Hukum tahun 1995.

Saya difahamkan bahawa penerbitan dua buah buku Fatwa Mufti Kerajaan dan Irsyad Hukum yang dilancarkan pada hari ini adalah merupakan langkah awal Jabatan ini dalam rangka memberikan pendedahan yang seluas-luasnya mengenai fatwa-fatwa yang telah dikeluarkan dan bahan-bahan ilmu pengetahuan Islam.

Langkah berterusan ke arah menerbitkan Fatwa Mufti

Sabda Yang Amat Mulia Pengiran Laila Kanun Diraja Pengiran Haji Bahrin bin Pengiran Haji Abas, Menteri Undang-Undang Negara Brunei Darussalam di Majlis Pelancaran Buku Fatwa Mufti Kerajaan dan Irsyad Hukum pada 13 Zulkaedah, 1417 bersamaan 22 Mac, 1997 bertempat di Centrepoin, Gadong Negara Brunei Darussalam



Kerajaan dalam bentuk buku ini adalah suatu usaha yang sangat baik dan bermakna dalam memberikan pengetahuan dan bimbingan hukum kepada umat Islam dalam bentuk yang kemas dan tersusun.

"Fatwa merupakan ketetapan hukum Allah Subhanahu Wata'ala yang mesti diketahui, dikerjakan dan dipatuhi. Ini adalah kerana ketetapan hukum tersebut merupakan hukum Allah Subhanahu Wata'ala yang dibuat melalui sumber rujukan yang sahih daripada al-Quran, Hadis, Ijma' Ulama dan Qias dari kitab-kitab berauthoriti."

Usaha ini bukan sahaja akan memudahkan umat Islam mendapatkannya sebagai rujukan untuk mengetahui dengan lebih lanjut lagi akan hukum-hukum yang difatwakan. Kemudahan ini adalah sangat berguna kerana sesuatu Fatwa dan Irsyad Hukum yang dikeluarkan itu adalah berhubungkait dengan soal-soal kehidupan harian umat Islam.

Dengan hal yang demikian, saya yakin, bahawa kedua-dua buku yang akan dilancarkan ini besar manfaatnya kepada umat Islam, kerana buku ini disamping


memberikan jawapan hukum kepada pertanyaan dan kemusykilan ugama yang diajukan, didalamnya juga mempunyai ciri atau sifat istimewa dalam menyebarkan ilmu Islam kepada umat Islam. Hal ini sesuai dengan kedudukan Mufti itu sebagai orang yang di beri kuasa dalam menentukan hukum-hukum berdasarkan Al-Quran, Sunnah, Ijma' Ulama dan Qias yang tepat dan betul.

Berdasarkan kedudukan ini, fatwa merupakan ketetapan hukum Allah Subhanahu Wataala yang mesti diketahui, dikerjakan dan dipatuhi. Ini adalah kerana ketetapan hukum tersebut merupakan hukum Allah Subhanahu Wataala yang telah dibuat melalui sumber rujukan yang sahih daripada Al-Quran, Hadis, Ijma' Ulama dan Qias dan kitab-kitab berauthoriti. Oleh kerana itu saya menyarankan supaya setiap keluarga Islam di Negara ini akan memiliki buku yang akan dilancarkan ini sebagai panduan dan rujukan. Mudah-mudahan dengan mengetahui hukum-hukum itu kita umat Islam akan sentiasa terpimpin mengikut jalan yang lurus.


وبالله التوفيق والحمد لله والسلام عليكم

ورحمة الله وبركاته

Sebelum memulakan tugas harian LAZIMKAN DIRI MEMBACA AL-QURAN



Walaupun setakat beberapa ayat setiap hari, jika diamalkan berterusan Insya Allah akhirnya akan khatam al-Qur'an di-setiap hujung tahun.



Jabatan Mufti Kerajaan, Jabatan Perdana Menteri menggalakkan pegawai dan kakitangannya membaca al-Qur'an dan sembahyang sunat Dhuha sebelum memulakan tugas harian.

PETIKAN TITAH

"Munasabah sempena dengan kita memperingati Nuzul al-Qur'an ini, serta demi untuk mendapatkan keberkatan dan cahaya daripada al-Qur'an itu, maka adalah seelok-elok pekerjaan untuk dijadikan tabiat khasnya oleh pegawai-pegawai dan kakitangan kerajaan, melazimkan diri masing-masing untuk membuka dan membaca Kitab Suci al-Qur'an, walaupun setakat beberapa ayat sahaja pada tiap-tiap hari sebelum memulakan tugas dan pekerjaan masing-masing."

- Dititahkan sempena sambutan Nuzul al-Quran pada 17 Ramadan, 1412 bersamaan 22 Mac, 1992 di Pusat Persidangan Antarabangsa Berakas.

Membaca al-Qur'an itu umpama bermiaga yang tidak menempuh kerugian, bahkan akan memperolehi pahala yang berlipat ganda. Secara umum fadhilat membaca al-Qur'an itu antaranya akan memberi syafaat kepada orang yang membacanya pada Hari Kiamat, mendatangkan rahmat, kebajikan, menerangkan hati, memperolehi kemuliaan dan banyak lagi.

Amalan membaca al-Qur'an sebelum memulakan tugas di kalangan pegawai dan kakitangan Kerajaan merupakan suatu kesempatan yang amat kena pada masanya dan sangat disanjung tinggi, yang mana faedahnya bukan hanya akan diterima oleh individu, tetapi juga dari segi jangka panjangnya akan memberi kesan yang baik kepada masyarakat dan negara.

MAJLIS TADARUS




JABATAN PERDANA MENTERI DI MASJID KAMPONG MASIN

Pemilihan Masjid sebagai tempat mengadakan Majlis Tadarus Jabatan Perdana Menteri kelolaan Jabatan Mufti Kerajaan bersama ahli Jawatankuasa Masjid Kampong Masin adalah mengingat betapa besarnya pahala dan kelebihan yang didapat dari membaca Al-Quran di dalam masjid. Selain itu, ia juga dapat merapatkan hubungan silaturrahim antara pegawai-pegawai dan penduduk kampung.

Majlis Tadarus berkenaan telah diadakan pada hari Ahad 16hb. Ramadhan 1417 bersamaan dengan 26hb. Januari 1997 di Masjid Kampong Masin.

Majlis dijalankan secara berhalaqah dengan tujuan dapat menghabiskan 30 juz. Kemudian diteruskan dengan Khatam Al-Quran dan bertahlil dengan hasrat untuk mengambil berkat bulan Ramadhan yang mulia.

Hadir di majlis itu ialah Yang Dimuliakan Lagi Dihormati Pehin Datu Seri Maharaja Dato Paduka Seri Setia Ustaz Haji Awg. Abd Aziz bin Juned, Mufti Kerajaan, dua orang Setiausaha Tetap di Jabatan Perdana Menteri, Timbalan Mufti Kerajaan, pegawai-pegawai kanan di bawah Jabatan Perdana Menteri, penduduk-penduduk kampung dan kawasan sekitarnya.



IBADAH KORBAN AMALAN MULIA

Melakukan ibadat korban sudah menjadi amalan Umat Islam di negara ini. Walaupun hukumnya sunat muakkadah namun masing-masing tidak melepaskan peluang melakukannya. Ada yang berkurban melalui kementerian, Jabatan, masjid, surau, kampung dan ada juga melakukannya secara persendirian. Korban dilakukan selepas Sembahyang Hari Raya 'Idil Adha sehingga 13 Zulhijjah.

Jabatan Mufti Kerajaan, Jabatan Perdana Menteri juga tidak ketinggalan mengadakannya. Ia telah diadakan pada hari Ahad 12 Zulhijjah 1417 bersamaan dengan 20 April 1997 di Mulaut Abbatoir.

Pada Hari Isnin 21 April 1997 bersamaan 13 Zulhijjah, 1417 pula Jabatan Mufti Kerajaan, Jabatan Perdana Menteri telah mengadakan Sambutan Hari Raya Aidil Adha bertempat di pejabat Jabatan Mufti Kerajaan.

Majlis Pelancaran Buku Terbitan Jabatan Mufti Kerajaan



Dua buah buku terbitan Jabatan Mufti Kerajaan, Jabatan Perdana Menteri telah dilancarkan pada 13 Zulkaedah, 1417 bersamaan 22 Mac, 1997 oleh Yang Amat Mulia Pengiran Laila Kanun Diraja Pengiran Haji Bahrin bin Pg. Haji Abas, Menteri Undang-Undang.

Buku-buku yang dilancarkan itu ialah Fatwa Mufti Kerajaan tahun 1994 dan 1995 yang difatwakan oleh Yang Dimuliakan Lagi Dihormati

Pehin Datu Seri Maharaja Dato Paduka Seri Setia Ustaz Haji Awg. Abd. Aziz bin Juned, Mufti Kerajaan Negara Brunei Darussalam.

Sementara sebuah lagi buku yang mengandungi bimbingan hukum yang diusahakan secara bersiri di Pelita Brunei sepanjang tahun 1995. Koleksi tersebut dibukukan menjadi sebuah buku yang dinamakan Irsyad Hukum.

Sementara itu, beberapa buah buku lagi akan diterbitkan dalam sedikit masa lagi. Ketika ini buku-buku tersebut masih dalam proses penyemakan.

Buku-buku tersebut ialah Fatwa Mufti Kerajaan tahun 1996 dan Irsyad Hukum tahun 1996.

Turut hadir di majlis tersebut ialah Yang Dimuliakan Lagi Dihormati Pehin Datu Seri Maharaja Dato Paduka Seri Setia Ustaz Haji Awang Abdul Aziz bin Juned, Mufti Kerajaan, Yang Dimuliakan Pehin Orang Kaya Setia Raja Dato Seri Setia Ustaz Haji Awang Suhaili bin Haji Mohiddin, Timbalan Mufti Kerajaan, Yang Dimuliakan Pehin Orang Kaya Lela Sura Dato Seri Laila Jasa Haji Awang Abas bin Haji Serudin, Setiausaha Tetap Kementerian Undang-Undang, Ketua-ketua Jabatan dan pegawai-pegawai kanan Kerajaan.

Skim Tarbiah Ulama DUA ORANG PEGAWAI MENJALANI TARBIAH DI LUAR NEGERI

Untuk meningkatkan kualiti pengetahuan dan ilmu pegawai-pegawai ilmu yang membantu Mufti dalam perkara perundangan Islam maka telah diwujudkan satu skim yang dinamakan Skim Tarbiyah Ulama' Jabatan Mufti Kerajaan Jabatan Perdana Menteri. Ketika ini dua orang pegawai sedang menjalani tarbiah melalui Kursus Sarjana Syari'ah melalui skim ini.



Awg. Hj. Japar bin Hj. Maidin, Pegawai Istintabat Kanan berkursus di Akademi Islam Universiti Malaya.




Awg. Hj. Mazanan bin Hj. Mohd. Yussof, Pegawai Istintabat Kanan berkursus di Fakulti Penagajian Islam Universiti Kebangsaan Malaysia.

MENYAMPAIKAN BIMBINGAN HUKUM MELALUI MEDIA KERAJAAN

Jabatan Mufti Kerajaan Jabatan Perdana Menteri telah mengeluarkan Irsyad atau bimbingan mengenai hukum melalui media massa Kerajaan sejak beberapa tahun kebelakangan melalui radio, televisyen dan Pelita Brunei.

Ruangan yang dinamakan Irsyad Hukum dimaksudkan sebagai penerangan hukum-hakam dan kehendak agama Islam mengenai sesuatu perkara yang berkaitan dengan hidup dan kehidupan umat Islam di negara ini khususnya. Matlamatnya ialah untuk



Sebahagian koleksi kitab yang terdapat di Jabatan Mufti Kerajaan Jabatan Perdana Menteri yang digunakan sebagai bahan rujukan.

melahirkan kefahaman, kesedaran dan keinsafan dalam diri Umat Islam pada menghayati hukum dan kehendak Islam selaku agama yang mendorong kepada pembangunan rohani dan kemajuan yang sebenarnya.

Untuk memberikan irsyad atau panduan pada menghayati Hari-Hari Kebesaran Islam, Jabatan Mufti Kerajaan, Jabatan Perdana Menteri juga mengungkayahkan rancangan bersama Jabatan Radio dan Televisyen. Rancangan ini dinamakan Bersama Mufti.

PROGRAM MENGUMPUL BUKU RUJUKAN ISLAM

Program koleksi buku-buku rujukan Jabatan Mufti Kerajaan Jabatan Perdana Menteri telah dimulakan dan dipesatkan lagi mulai tahun 1997 dengan pembelian yang diprogramkan melalui rancangan lima-lima tahun. Program ini bertujuan untuk mencapai matlamat menjadikan Qismul Hikmah Jabatan Mufti Kerajaan Jabatan Perdana Menteri sebagai pusat rujukan mengenai Islam.

Tokoh Ugama Yang Disegani

Pehin Datu Seri Maharaja Dato Seri Utama Dr. Awang Haji Ismail Bin Omar Abdul Aziz

[Bahagian Pertama]

Oleh: Awg. Haji Muhammad Hadi bin Abdullah
Pusat Sejarah Negara Brunei Darussalam



Allahyarham Pehin Datu Seri Maharaja Dato Seri Utama Dr. Awang Haji Ismail bin Omar Abdul Aziz dilahirkan pada T.M. 1911 (T.H. 1329) di Kampong Rengit, Batu Pahat, Johor. Mendapat pendidikan awal di Sekolah Melayu dan Sekolah Al-Quran Kerajaan Johor (1919-1923) dan kemudian menuntut di Sekolah Arab Al-Attas, Johor Bahru (1923-1928). Setelah menamatkan pengajian di Sekolah Arab Al-Attas, dalam tahun 1929 beliau diaturkan mengajar di sekolah ini dan Kuliah (Kolej) Al-Attas, Johor Bahru sehingga tahun 1937. Dalam tahun 1938, beliau dikurniakan biasiswa oleh Kerajaan Johor untuk melanjutkan pelajaran di Universiti Al-Azhar dan Universiti Kaherah, Mesir (sehingga 1948) dan berjaya memperolehi tidak kurang daripada lima ijazah tinggi dari lima fakulti pengajian di universiti-universiti berkenaan. Pada 25 September 1991 beliau dianugerahkan Ijazah Doktor Kehormat Undang-Undang daripada Universiti Brunei Darussalam.

Sekembalinya dari Mesir pada tahun 1949, beliau dilantik menjadi Pegawai Pemeriksa Sekolah Arab dan Pengelola Majalah Warta Jabatan Ugama Johor (sehingga 1952). Setelah itu dinaikkan pangkat menjadi Kadhi Daerah Segamat, Johor (1953-1954).

Dalam tahun 1955, beliau dipinjamkan menjadi Pengetua di Kolej Islam Malaya, yang baru ditubuhkan bertempat di sebuah istana wakaf Almarhum Sultan Hishamuddin Alam Shah, Selangor. Dalam masa yang sama beliau bersama Tuan Haji Othman bin Haji Mohammad, Ketua Pemeriksa Sekolah-Sekolah Agama Kerajaan Johor (kemudian dilantik menjadi Pengelola Sekolah-Sekolah Agama Kerajaan Brunei Darussalam) telah dijemput ke Negara Brunei Darussalam sebagai anggota meninjau cadangan mendirikan Sekolah Agama Kerajaan Brunei atas titah perkenan Almarhum Sultan Haji Omar 'Ali Saifuddien Sa'adul Khairi Waddien. Berikutan daripada lawatan itu, dalam bulan September 1956, sebuah sekolah agama yang bersistem telah ditubuhkan buat pertama kalinya di Negara Brunei Darussalam.

Dalam tahun 1956 beliau kembali ke Johor kerana dilantik menjadi Pemangku Timbalan Mufti Kerajaan Johor. Kemudian menjadi Kadhi Daerah Pontian, Johor (1957); Pemangku Kadhi Besar Johor (1958) dan seterusnya ditetapkan jawatan sebagai Kadhi Besar Johor (1958-1961). Pada 1 April 1962, beliau telah dipinjamkan oleh Kerajaan Johor menjadi Mufti Kerajaan Brunei selama tiga tahun. Lantikan ini

adalah berdasarkan persetujuan awal di antara Almarhum Sultan Haji Omar 'Ali Saifuddien Sa'adul Khairi Waddien dengan Almarhum Sultan Ismail ibni Almarhum Sultan Ibrahim, Sultan Johor. Perlunya mengadakan jawatan Mufti ini bukan sahaja menurut kehendak Undang-Undang Majlis Ugama dan Mahkamah-Mahkamah Kadhi No. 20/1955, tetapi Almarhum Sultan Haji Omar 'Ali Saifuddien Sa'adul Khairi Waddien sendiri mengakui kepentingannya sebagaimana warkah baginda kepada Menteri Besar Brunei:

“Amatlah susah bagi yang sudah kita telah alami jika terbit satu masalah yang bersabit dengan agama Islam jika sebuah negara Islam yang merasmikan agama Islam yang diakui suci tidak mempunyai seorang ulama yang benar-benar akan bertugas memberatkan atau mengambil berat sama ada dalam memberi fatwa-fatwa dan menghuraikan peraturan dan hukum-hukum dan lain untuk kesentosaan rakyat umat Brunei dan negeri itu.”¹

Beliau menamatkan kontrak

¹ Warkah Almarhum Sultan Haji Omar 'Ali Saifuddien Sa'adul Khairi Waddien kepada Menteri Besar Brunei bertarikh 24 Januari 1961.

perkhidmatan dengan Kerajaan Brunei pada sehingga 31 Mac 1965 dan kembali berkhidmat semula dengan Kerajaan Johor sebagai Timbalan Mufti sehingga bersara pada 1 Januari 1967. Pada 8 Mac 1967, beliau meneruskan perkhidmatannya dengan Kerajaan Brunei sebagai Mufti sehingga kembali ke Rahmatullah di Rumah Sakit Raja Isteri Pengiran Anak Saleha pada 3 Februari 1993. Perlantikan beliau ini telah diperkenankan oleh Almarhum Sultan Haji Omar 'Ali Saifuddien Sa'adul Khairi Waddien mulai dari 11 Mac 1967 berdasarkan Bab 40 (1) daripada Undang-Undang Majlis Ugama dan Mahkamah Kadhi, 1955.¹

Selama berkhidmat dengan Kerajaan Brunei Darussalam, beliau telah dilantik menjadi ahli dalam berbagai majlis negara atau jawatankuasa, antaranya: Ahli Majlis Mesyuarat Mengangkat Raja; Ahli Majlis Ugama Islam Brunei Darussalam; Pengerusi Jawatankuasa Kehakiman, Majlis Ugama Islam Brunei Darussalam; Pengerusi Undang-Undang, Majlis Ugama Islam Brunei Darussalam; Ahli Majlis Universiti Brunei Darussalam; Ahli Majlis Institut Pengajian Islam Brunei Darussalam; Ahli Majlis Maktab Perguruan Ugama Seri Begawan; Ahli Jawatankuasa Menyesuaikan Undang-Undang dengan Kehendak Syarak; Ahli Lembaga Peperiksaan Pelajaran Ugama; Ahli Jawatankuasa Mengeluarkan Wang Zakat Fitrah bagi Majlis Ugama Islam Brunei Darussalam; dan Penasihat bersama Penubuhan Tabung Amanah Islam Brunei (TAIB). Dianggarkan lebih daripada 40 majlis atau jawatankuasa yang beliau anggota selama berkhidmat dengan Kerajaan Brunei dan Malaya (Ma-

laysia).

Dalam kegiatan keilmuan beliau juga telah beberapa kali mewakili Negara Brunei Darussalam bagi menghadiri seminar-seminar dan kongres-kongres di peringkat serantau dan antarabangsa, antaranya: Muktamar Al-Alamil Islami (di Baghdad, Iraq; di Kuala Lumpur, Malaysia; di Mogadishu, Somalia; di Karachi, Pakistan; dan di Famagusta, Turki); Persidangan As-Siratin Nabawiyyah di Kaherah, Mesir; Persidangan Antarabangsa Iktisad dan Ekonomi Islam di Makkatul Mukarramah, Arab Saudi; Persidangan Persekutuan Ulama Indonesia di Jakarta, Republik Indonesia; Persidangan Ahlil Bait (MAAB) di Amman, Jordan dan Persidangan Menteri-Menteri Waqaf di Jeddah, Arab Saudi.

Sebagai seorang yang arif dan mendalami bidang agama, beliau sentiasa menyumbangkan buah fikiran dan nasihat yang disalurkan melalui buku atau kitab, risalah dan makalah, antaranya: "Kitab Pelajaran Fiqh", Penggal I; "Syair Abu Tammam" dalam bahasa Arab (1948); "Bagaimana Agama Islam Masuk ke Brunei Menurut Kitab-Kitab Lama Bahasa Arab" (1965); "Bagaimana Kita Mengambil Faedah dari Al-Quran" (1967); "Kitab Ringkasan Aqidah Ahli Sunnah wal-Jema'ah" (1979); "Peribadi Orang Islam" (1980); "Corak Pendidikan dalam Islam berhubung dengan Pendidikan di Negeri Brunei Darussalam" (1981); "Risalah Didikan Akhlak" (1985); "Konsep Melayu Islam Beraja di Negara Brunei Darussalam" (1985); Konsep Pengajian Tinggi Islam" (1987); "Hukum Nikah Kahwin" Cara Islam dan Hukum yang Berbangkit daripada Nikah Kahwin" (1987); dan "Kisah Hidup Al-'Allaamah Asy-Syeikh Muhammad Fadzlullah Suhaimi bin Abdullah" (1991).

Di antara sumbangan beliau yang paling berharga dan penting untuk menjadi panduan hidup umat Islam ialah penghasilan fatwa-fatwa. Sejak tahun 1962 (tidak termasuk tahun 1965-1967) sehingga akhir hayat beliau dianggarkan lebih 600 fatwa (tidak termasuk fatwa yang dihasilkan ketika berkhidmat di Johor) telah dihasilkan. Kesemua fatwa itu berasaskan Mazhab Syafie daripada segi Fiqh dan Ahli Sunnah wal-Jema'ah daripada segi Aqidah. Beliau juga telah menulis beberapa kertas kerja dan memberikan syarahan, antaranya mengenai: "Ringkasan Wirid Bacaan Pagi dan Petang dengan Dalil daripada Quran dan Hadith", "Dalil daripada Quran dan Hadith", "Dalil daripada Quran dan Hadith mengenai Al-Windul Latif oleh Qutbul Irsyad wad-Da'wah Al-'Allaamah Habib As-Sayid Abdullah bin Mohammad Al-Haddad", "Dalil daripada Quran dan Sunnah mengenai Wirid Asal oleh Qutbud-Dunya Al-'Aarif Billah Asy-Syeikh Abdul Qadir Jailani, Baghdad", "Pandangan Islam" (dibukukan dalam empat penggal), "Ugama Didikan Sosial", "Ilmu Tasawuf dan Hubungannya dengan Islam dan Iman", "Perkara Panduan Jurunikah dan Hukum-Hukum Nikah yang Berhubung Dengannya", "Perkara Aqidah Ahli Sunnah wal-Jema'ah dalam Pentadbiran Pegawai-Pegawai Kerajaan Negara Brunei Darussalam", dan "Bagaimana Kita Mengkaji Fiqh Aliran atau Mazhab Al-Iman Asy-Syafie RadhiAllahu 'Anhu". Tulisan-tulisan beliau telah diterbitkan dan disiarkan dalam berbagai bentuk dan melalui berbagai media. Beliau juga banyak membuat kajian dan telahan mengenai masalah-masalah Fiqh dan Aqidah, sehingga kebanyakan hasil tulisan Allahyarham dijadikan sumber rujukan asas kajian ilmiah, dan masih disimpan di Universiti Kebangsaan Malaysia.

¹ Surat Menteri Besar Brunei, Bil: SUK/E/65/61 bertarikh 6 April 1967.

QAUL MUKTAMAD IS THE BASIC GUIDELINE OF FATWA [Part One]

By: Siti Alawiyah Haji Mohd. Zainal

In a particular issue concerning Islamic jurisprudence (*fiqh*), it is usual to find variant views either for example, from a leader of juristic reasoning (*imam mujtahid*) or from a few prominent religious jurists (*fujahah*). Naturally, in such a case, there will be one view which is the strongest, better known as the most preferable (*al-rajih*). It is this view that is said to be the reliable (*mu'tamad*) view and dictum (*qaул*) - the dictum which is applied and adopted in the making of the fatwa in the issue raised.

On the subject of *qaул mu'tamad* within the school of Imam Al-Syafie Rahimahullahu Ta'ala, there are variant views, among them are the following:

The First View:

'*Qaul jadid*' (later rulings): Al-Imam Al-Syafie's *fatwa* and juristic reasoning (*ijtihad*) after his travel to Egypt, in the year 200 Hijriah, until his death, in the year 205 Hijriah. *Qaul jadid* also includes the rulings before his journey to Egypt - which are similar to his later rulings. Al-Imam Al-Syafie's rulings before he went to

Egypt are known as '*qaул qadim*' or earlier rulings. According to *fujahah* of the Al-Syafie's school, Al-Imam Al-Syafie's '*qaул qadim*' are disregarded and not practiced except in certain cases or situations. Some among them claim there are about twenty issues in which Al-Imam Al-Syafie's '*qaул qadim*' are preferred and practiced. Other scholars maintain that the number is only three, while the rest claim that '*qaул qadim*' is actually still upheld in as many as fourteen issues like in the case of *tatwib* (the reminder that the prayer is better than sleep) in the call for Subuh prayer.

According to '*qaул qadim*' the *tatwib* is *sunat* (supererogatory act) while '*qaул jadid*' says that it is *makruh* (undesirable). So, what is taken to be a ruling in this instance, by the disciples and companions of Al-Imam Al-Syafie, is his '*qaул qadim*'. It is the same in the case of bare skins coming into contact among *mahrabs* (relatives not permitted to marry); '*qaул qadim*' does not nullify the ablution. Similarly in the case of the congregation saying *ameen* loudly in prayers - prayers that are per-

formed out loud like the Maghrib, 'Isya' and Subuh prayers. According to '*qaул qadim*' this is *sunat* and that is what the companions of Al-Imam Al-Syafie have ruled.

The Second View:

This view maintains that every fatwa agreed upon by both Al-Imam Al-Nawawi and Al-Imam Al-Rafie is '*qaул mu'tamad*'. This means that when a ruling over a certain issue is obtained through a consensus between Imam Nawawi and Imam Rafie, that ruling, according to the Syafie's school of thought, is '*qaул mu'tamad*'. That is the gist of their statement:

القول المعتمد هو ما اتفق عليه الشخان (النوعي والرافعى رحمهما الله).

Al-Qaul Al-Mu'tamad is one upon which the two syeikhs agree (Al-Nawawi and Al-Rifa'e, may Allah have mercy upon them both).

The Third View:

According this view, whichever issue mentions the '*al-mazhab*', as they would say: "In this case, according to *al-mazhab*, it is prohibited (*haram*)", it is taken to mean that the ruling in that issue is '*qaул mu'tamad*'. '*Al-Mazhab*' here is referred to the Al-Syafie's school of thought. Such occurrences are often found in the border commentaries (*hasyiah*) written by jurists of later period (*fujahah muta 'akhkhirin*) of the Syafie's school of thought like the border commentary of Qalyubi wa 'Umairah, Al-Baijuri and others.

Among these three views, the first view is the strongest whereby *al-qaул al-mu'tamad* consists of Al-Imam Al-Syafie's '*qaул jadid*' and a few of his

qaul qadim, fatwa and ijтиhad made before he travelled to Egypt.

Among the more obvious factors as to why this view is preferred is the fact that each case had been referred to the scholar of the *Imam* of the school himself and it was through his juristic reasoning that the rulings were made. The *Imam* was known as *Imam Mujtahid Mutlak* who set up the guidelines for the path of juristic reasoning (*manhaj ijтиhad*).

Other *ulama* (learned Muslims) in the Syafie's school of thought are simply *mujtahid mazhab* and *mujtahid muntasib*. Whatever rulings they issue were merely made from an adherence to Al-*Imam Al-Syafie*'s guidelines and not originating from these *ulama* themselves. Even though in a few instances they seem to differ from Al-*Imam Al-Syafie*, these *ulama* maintain that they are not in disagreement with the findings of Al-*Imam Al-Syafie* but are merely in disagreement amongst themselves over some of the views of Al-*Imam Al-Syafie*.

In conclusion, the role of *qaul mu'tamad* in *fatwa* is very clear. *Qaul mu'tamad*, whether taken from its original source (Al-Umm of Al-*Imam Al-Syafi'e*) or derived from adhering to Al-*Imam Al-Syafie*'s *usul al-fiqh* (source methodology in Islamic jurisprudence) is the main support, especially to the Mufti in deciding on the Islamic law governing various religious issues.

Should there be two conflicting opinions in a particular issue, the *ulama* will try to search for evidences (*dalil*) on the issue concerned until the strongest evidence is found - one which they all agree to be *qaul mu'tamad*. It is through this *qaul mu'tamad* that a decision on Islamic law or ruling is made and determined by the Mufti.

SELAWAT TAFRIJIYYAH

بِسْمِ اللَّهِ الرَّحْمَنِ الرَّحِيمِ

اللَّهُمَّ صَلِّ صَلَةً كَامِلَةً وَسَلِّمْ سَلَامًا تَامًا عَلَى سَيِّدِنَا مُحَمَّدٍ الَّذِي
تَحَلَّ بِهِ الْعُقُدُ وَتَنْفَرُجُ بِهِ الْكُرَبُ وَتُقْضَى بِهِ الْحَوَائِجُ وَتَسْأَلُ بِهِ
الرَّغَائِبُ وَحُسْنُ الْخَوَاتِمِ وَيُسْتَسْقَى الْغَمَامُ بِوْجُوهِ الْكَرِيمِ وَعَلَى أَلِهِ
وَصَاحِبِهِ فِي كُلِّ لَمْحَةٍ وَنَفْسٍ بَعْدَ كُلِّ مَعْلُومٍ لَكَ

Ertinya : "Ya Allah, limpahkanlah rahmat yang sempurna dan berilah kesejahteraan yang sempurna kepada junjungan kita Nabi Muhammad Sallallahu 'Alaihi Wasallam yang menjadi sebab terlepasnya sesuatu yang masih mengalami jalan buntu dan terbukanya kesempitan serta didatanginya semua hajat dan diperoleh semua pemberian serta husnul khatimah (bagus akhir hayatnya) dan diturunkan siraman mendung (hujan) lantaran keagungan baginda. (Dan limpahkanlah rahmat dan salam) kepada keluarga baginda, dan sahabat baginda di dalam setiap kerlipan mata dan nafas dengan bilangan semua yang diketahui oleh-Mu, wahan Zat yang menguasai seluruh alam".

Berkata Al-*Imam Ad-Dainuri* : "Barangsiapa melazimkan membaca selawat ini 11 (sebelas) kali pada tiap-tiap lepas dari sembahyang serta menjadikannya wirid, nescaya tidak putus rezkinya dan mendapat dia kedudukan yang tinggi dan kerajaan yang kaya raya."

Katanya lagi : "Barangsiapa melazimkan membacanya pada tiap-tiap hari 41 (empat puluh satu) kali selepas sembahyang Subuh, nescaya akan tercapai semua hajatnya."

Katanya lagi : "Barangsiapa melazimkan membacanya pada tiap-tiap hari 100 (seratus) kali, nescaya berhasil permintaannya dan tercapai maksudnya lebih daripada yang dikehendakinya."

Katanya lagi : "Berangsiapa melazimkan membacanya pada tiap-tiap hari dengan bilangan Rasul-Rasul 'Alaihimussalatu Wassalam, iaitu sebanyak 313 (tiga ratus tiga belas), nescaya baginya dimudahkan rahasia-rahsia dan dapat melihat tiap-tiap sesuatu perkara yang dikehendakinya."

Katanya lagi : "Barangsiapa melazimkan membacanya pada tiap-tiap hari 1,000 (seribu) kali, maka baginya (akan beroleh) apa yang tidak mungkin disifatkan oleh manusia, (iaitu) apa yang tiada pernah dilihat oleh mata, tiada pernah didengar oleh telinga dan tiada pernah terlintas di hati manusia."

Berkata Al-*Imam Al-Qurtubi* : "Barangsiapa ingin berhasil (memperolehi kejayaan) dalam satu-satu perkara penting lagi besar, atau untuk menolak bala, maka bacalah selawat ini sambil bertawassul kepada Nabi Sallallhu 'Alaihi Wasallam sebanyak 4,444 (empat ribu empat ratus empat puluh empat) kali. Sesungguhnya Allah Ta'ala akan menyampaikan apa juia yang dihajatinya berdasarkan niatnya itu."

TARBIAH MINDA

SYARAT DAN PERATURAN

1. Quiz terbuka kepada semua pembaca yang terdiri daripada rakyat dan penduduk Negara Brunei Darussalam sahaja.
2. Peserta hanya dibenarkan menghantar satu penyertaan sahaja.
3. Soalan-soalan hendaklah dijawab dalam kertas berukuran A4 disertakan dengan Nama, alamat lengkap dan nombor telefon.
4. Soalan-soalan bersumber daripada *suratberita al-Hadaf*, buku terbitan Jabatan Mufti Kerajaan Jabatan Perdana Menteri dan Rancangan radio **Irsyad Hukum** menerusi Rangkaian Nur Islam 93.3 FM.
5. Pengajur akan menyediakan satu hadiah istimewa kepada seorang sahaja yang berjaya menjawab kesemua soalan dengan betul. Jika lebih dari seorang yang menjawab dengan betul, maka pihak Pengajur menghendaki peserta-peserta itu menulis sebuah karangan yang mengandungi 20 - 30 patah perkataan mengenai suatu tajuk yang akan diberikan kemudian. Peserta yang karangannya terbaik akan dikira sebagai pemenang.
6. Hadiah tidak boleh ditukar dengan wang tunai.
7. Jawapan dan keputusan akan dimuatkan dalam keluaran berikutnya dan juga akan dimaklumkan melalui surat kepada pemenang.
8. Keputusan adalah mutlak dan surat menyurat mengenainya tidak akan dilayan.
9. Penyertaan hendaklah dihantar kepada:

KETUA PENGARANG al-Hadaf
Jabatan Mufti Kerajaan,
Jabatan Perdana Menteri
Tingkat 3, Bangunan Kementerian
Hal Ehwal Ugama,
Bandar Seri Begawan, 1180.
Brunei Darussalam.

10. Tarikh tutup: 15 Julai 1997

1. Jabatan Mufti Kerajaan Jabatan Perdana Menteri adalah sebuah jabatan yang berasingan di bawah Jabatan Perdana Menteri. Bilakah Jabatan Mufti Kerajaan ditubuhkan dan macamana kedudukannya sebelum menjadi sebuah jabatan?
2. “*Fatwa merupakan ketetapan hukum Allah Subhanahu Wata’ala yang mesti diketahui, dikerjakan dan dipatuhi*”. Demikian antara yang dilafazkan di Majlis Pelancaran buku Jabatan Mufti Kerajaan Jabatan Perdana Menteri baru-baru ini.
 - a) Siapakah yang melafazkan sabda / ucapan tersebut ?
 - b) Sebutkan nama buku-buku yang dilancarkan ?
3. Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam pernah menitahkan supaya pegawai dan kakitangan Kerajaan menjadikan tabi’at membaca al-Qur'an sebelum memulakan tugas harian.
 Apakah langkah atau usaha yang patut dibuat bagi pegawai dan kakitangan Kerajaan yang bertugas di pejabat yang tidak tahu membaca al-Qur'an ?
4. Wali dalam pernikahan ialah orang yang berhak menikahkan perempuan yang akan dinikahkan seperti bapa, datuk (bapa bagi bapa), saudara lelaki dan lain-lain.
 - a) Sebutkan perkara yang menjadi syarat bagi wali itu ?
 - b) Bagaimana jika terdapat persamaan taraf atau darjah pada 2 orang wali atau lebih ?
5. Majlis Perkahwinan yang baik ialah ringan perbelanjaannya, tidak memberatkan, tidak menyusahkan, tidak bermewah-mewah, tidak melebihi batas yang diperlukan dan tidak membawa kepada pembaziran.
 - a) Apakah hukum mengadakan kenduri kahwin atau jamuan kahwin itu ?
 - b) Apakah sekurang-kurang bagi orang yang berada dan yang tidak berada, jika mengadakan kenduri kahwin atau jamuan kahwin ?




DALAM PASARAN

Buku Fatwa Mufti Kerajaan (1994 - 1995)

Buku ini mengadungi fatwa Yang Dimuliakan Lagi Dihormati Pehin Datu Seri Maharaja Dato Paduka Seri Setia Ustaz Haji Awang Abd. Aziz bin Juned, Mufti Kerajaan, yang dikeluarkan dari bulan September 1994 hingga akhir tahun 1995.

Penerbitan buku ini merupakan keluaran yang pertama, dalam usaha Jabatan Mufti Kerajaan Jabatan Perdana Menteri menyebar-luaskan fatwa Mufti Kerajaan Negara Brunei Darussalam sejak negara ini mempunyai Mufti. Buku Fatwa Mufti Kerajaan ini mempunyai manfaat yang besar kepada Umat Islam kerana disamping memberi penjelasan hukum atau doktrin Islam kepada pertanyaan dan kemosykilan ugama, fatwa tersebut juga secara tradisinya mempunyai ciri pada menyebarkan ilmu pengetahuan Islam yang berkaitan dengan fatwa yang diberikan.




| | |
|-------------|-----------------------------|
| Tebal | : 248 Muka surat |
| Penerbit | : Jabatan Mufti Kerajaan |
| Pengedar/ | : Avesta Printing & Trading |
| Pencetak | : Sendirian Berhad |
| KULIT TEBAL | : BS 50.00 |
| KULIT NIPIS | : BS 30.00 |


Buku Fatwa Mufti Kerajaan ini dibahagikan kepada 14 bab, membincarakan isu-isu yang berkaitan dengan al-Qur'an, sembahyang, puasa, zakat, haji dan umrah, masjid / surau, makanan, kemasyarakatan, perkahwinan dan kekeluargaan, perhaiasan, tariqat, perayaan ugama, muamalah kewangan, kubur dan sejarah Nabi.

Buku ini perlu dimileki oleh setiap keluarga Islam

Akan Terbit



Difatwakan oleh:
Yang Dimuliakan Lagi Dihormati
Pehin Datu Seri Maharaja
Dato Paduka Seri Setia
Ustaz Haji Awang Abd. Aziz bin Juned,
Mufti Kerajaan
Negara Brunei Darussalam
Sepanjang tahun 1996



Bimbining Hukum
yang diusahakan secara bersiri
di Pelita Brunei Sepanjang tahun 1996
oleh Jabatan Mufti Kerajaan,
Jabatan Perdana Menteri
Negara Brunei Darussalam

IRSYAD: BERSIHKAH PAKAIAN MENGGUNAKAN MESIN PEMBASUH?

Islam menggalakan kebersihan. Bersih meliputi semua perkara termasuk tubuh badan, pakaian, tempat, makan minum, dan hati. Bersih bukan saja daripada najis bahkan juga kotoran dan segala pemandangan yang tidak menyenangkan, apatah lagi yang menyakiti.

Dalam sebuah hadith daripada Ibnu Malik Al-Ash'ari radhiyallahu 'anhу Nabi Sallallahu 'Alaihi Wasallam bersabda:



Maksudnya: "Kebersihan itu separuh daripada Iman"

Tiap-tiap yang kotor (tidak bersih) itu tidak semestinya najis tetapi sebaliknya tiap-tiap yang najis itu adalah kotor (tidak bersih). Umpamanya pakaian yang terkena lumpur tanah, kuah kari atau kopi adalah kotor (tidak bersih). Ianya tidak najis tetapi pakaian kotor.

Memandangkan teknologi masa kini, kebanyakan orang menggunakan mesin pencuci pakaian, akan timbul persoalan: Besikhah pakaian menggunakan mesin pembasuh? Perkara ini timbul kerana terdapat berbagai-bagai jenis mesin pembasuh ketika ini, sehingga ada yang berperanan boleh mengeringkan dengan hanya menekan satu punut sahaja.

Macamanakah kalau diantara pakaian yang hendak dicuci itu terkena kotoran atau ada najis? Apakah boleh bersih pakaian-pakaian ini di campur sekali cuci menggunakan mesin pembasuh? Jika tidak, apakah ada kaedah atau cara tertentu mengainanya?

Dalam hal mencuci pakaian menggunakan mesin pembasuh ini, yang pertama sekali yang perlu diambil perhatian ialah air yang akan digunakan. Air itu hendaklah air mutlak, iaitu air yang suci lagi menyucikan.

Kemudian perhatikan pakaian yang hendak dibasuh sebelum di masukkan

ke dalam mesin pembasuh. Jika ada pakaian yang terkena najis hendaklah terlebih dahulu dibersihkan atau dibuang najisnya ('ainnya sehingga hilang rasa, warna dan baunya) dengan cara dibasuh bersungguh-sungguh. Jika hilang dua daripada tiga termasuk rasa, maka memadai seperti hilang rasa dan bau saja atau rasa dan warna. Yang penting rasa mesti dihilangkan. Jika rasa masih ada, setelah hilang bau dan warna, maka tidaklah memadai.

Untuk lebih jelas tentang membersihkan pakaian yang terkena najis ini, yang pertama sekali kenal pasti terlebih dahulu apa najis yang mengenai pakaian itu. Adakah ia Najis Mukhaffafah, Najis Mutawassitah atau Najis Mughallazah.

(i) Najis Mukhaffafah:

Najis Mukhaffafah ialah najis ringan, seperti air kencing kanak-kanak lelaki yang belum sampai umurnya dua tahun dan belum makan makanan secara mengenyangkan melainkan susu (dada) sahaja. Jika kanak-kanak itu makan atau minum selain susu dada seperti susu tepung, maka air kencing kanak-kanak itu tidak lagi dianggap sebagai najis mukhaffafah bahkan ia adalah najis mutawassitah. Mana-mana pakaian yang terkena najis mukhaffafah memadai dengan merinjis air ke atas pakaian yang terkena najis itu.

(ii) Najis Mutawassitah:

Najis Mutawassitah ialah najis pertengahan, seperti air kencing orang dewasa, tahi, muntah, darah dan lain-lain. Menghilang atau membuang najis ini hendaklah dengan menghilangkan 'ainnya sehingga hilang rasa, bau dan warna dengan cara mengalirkan atau menjirus air ke atas pakaian yang kena najis itu. Adalah tidak memadai membasuh dengan air yang ditakung dalam bekas yang kurang dari dua kolah seperti air yang ditakung dalam

besin atau baldi, di mana pakaian-pakaian itu dicelup di dalamnya sekalipun beberapa kali.

iii) Najis Mughallazah:

Najis Mughallazah ialah najis yang berat seperti anjing, babi dan campuran atau kacukan keduanya. Jika darah, tahi, air liur, atau air kencing terkena pakaian, maka cara menyucikannya hendaklah dihilangkan 'ainnya (warna, bau dan rasa) terlebih dahulu. Kemudian dibasuh tujuh kali dengan menjiruskan air, termasuk sekali dengan air yang bercampur dengan tanah.

Setelah pakaian yang terkena najis itu dibersihkan dengan cara yang disebutkan itu, barulah pakaian itu dimasukkan ke dalam mesin pembasuh untuk penyucian seterusnya. Proses ini adalah lebih mudah berbanding jika pakaian yang bersih dan bernajis dimasukkan semuanya ke dalam mesin pembasuh. Ini menyebabkan semua pakaian akan terkena najis. Jika ini terjadi pakaian-pakaian itu hendaklah dibilas sambil mengalirkan air dari atas terus keluar tanpa air bertakung di dalamnya untuk beberapa ketika.

Bagi pakaian yang kotor pula, seperti terkena lumpur tanah, kuah kari, kopi dan seumpamanya, walaupun ia tidak najis namun ia hendaklah juga dibasuh terlebih dahulu sehingga hilang 'ainnya. Kemudian barulah dimasukkan ke dalam mesin pembasuh. Proses ini dibuat semata-mata untuk mengelakkan pakaian-pakaian lain yang bersih terkena kotoran.

Itulah keindahan Islam. Ajaran-ajarannya meliputi semua perkara termasuk ehwal kebersihan. Sesungguhnya Allah suka kepada orang yang bersih dari segala kekotoran, bersih dari perbuatan yang tidak diingini dan dilarang, dan bertaubat dari membuat dosa.

Kemudahan hasil teknologi baru tidak menghalang kita menjaga kebersihan. Cuma yang perlu diambil kira ialah cara penggunaannya yang betul. Oleh itu pergunakanlah ia dengan sebaiknya pada membantu mempercepatkan proses kerja harian kita tanpa membelakangkan kaedah ke arah kebersihan yang sebenarnya.